

皇甫曾集卷上

五言古詩

贈霈禪師

南嶽滿湘源吾師經利涉身歸沃洲老名與支公
接淨教傳荆吳道緣正漁獵觀空色不染對境心
自愜室中人寂寞門外山稠疊天台積幽夢早晚
當負笈

五言律詩

奉陪韋中丞使君遊鶴林寺

古寺傳燈久層城閉閣閑香花同法侶旌旆入深

皇清詩集卷上
山寒磬虛空裏孤雲起滅間謝公憶高臥徒御欲
忘還

奉送杜侍御還京

罷戰回龍節朝天識鳳池寒生五湖道春及萬年
枝郡化多遺愛官清已畏知懷恩偏感別墜淚向
旌麾

酬鄭侍御秋夜見寄

搖落空林夜河陽興已生未辭公府步知結遠山
情高柳風難定寒泉月助明袁公方臥雪尺素及
柴荆

送普上人還陽羨

花宮難久別道者憶千燈殘雪入林路暮山歸寺
僧日光依嫩草泉響滴春冰何用求方便看心是
一乘

送李中丞歸本道

上將宜分闡雙旌復去秦關河三晉路實從五原
人碣石山通海滹沱雪度春酬恩看玉劍何處有
煙塵

和謝舍人雪夜寓直

禁省夜沉沉春風雪滿林滄洲歸客夢青瑣近臣

心揮翰宜鳴玉承恩在賜金建章寒漏起更助掖
垣深

傷陸處士

從此無期見柴門對雪開二毛逢世難萬恨掩泉
臺返照空堂夕孤城弔客迴漢家偏訪道猶畏鶴
書來

烏程水樓留別

悠然千里去惜此一罇同客散高樓上帆飛細雨
中川程隨遠水楚思望青楓共說前期易滄波處
處通

西陵寄二公

西陵遇風處自古是通津終日空江上雲山若待
人汀洲寒事早魚鳥興情新西望稽山路吾心有
所親

題贈吳門邕上人

春山唯一室獨坐草萋萋身寂心成道花閑鳥自
啼細泉松徑裏返景竹林西晚與門人別依依出
虎谿

送著公歸越

誰能愁此別到越會相逢長憶雲門寺門前千萬

峯石牀理積雪山路倒枯松莫學白道士無人知
去蹤

送陸鴻漸山人採茶廻

千峰待逋客香茗復叢生採摘知深處煙霞羨獨
行幽期山寺遠野飯石泉清寂寂燃燈夜相思一
磬聲

寄劉員外長卿

南憶新安郡千山帶夕陽斷猿知夜久秋草助江
長踈髮應成素青松獨耐霜愛才稱漢主題柱待
回鄉

寄張象甫

悲風還舊浦雲嶺隔東田伏臘同雞黍柴門閉雪
天孤村明夜火稚子候歸船靜者心相憶離居畏
度年

送元侍御充使湖南

雲夢南行盡三湘萬里流山川重分首徒御亦悲
秋白簡勞王事清爰助客愁離群復多病歲晚憶
滄洲

送韓司直

遊吳還適越來往任風波復送王孫去其如芳草

何岸明殘雪在潮滿夕陽多季子留遺廟停舟試
一過

晚至華陰

臘盡促歸心行人及華陰雲霞仙掌出松栢古祠
深野渡冰生岸寒川燒隔林溫泉看漸近宮樹晚
沉沉

送孔徵士

谷口山多處君歸不可尋家貧清史在身老白雲
深掃雪開松徑疏泉過竹林余生負丘壑相送亦
何心

秋興

流螢與落葉秋晚共紛紛返照城中盡寒砧雨外
聞離人見衰鬢獨鶴暮何群楚客在千里相思看
碧雲

送歸中丞使新羅

南憲銜恩去東夷泛海行天遙辭上國水盡到孤
城已變炎涼氣仍愁浩淼程雲濤不可極來往見
雙旌

送少微上人東南遊

石梁人不到獨往更迢迢乞食山家少尋鍾野寺

遙松門風自掃瀑布雪難消秋夜聞清梵餘音逐
海潮

送韋判官赴閩中

孤棹閩中客雙旌海上軍
路人從北少嶺水向南
分野鶴傷秋別林猿忌夜聞
漢家崇亞相知子遠
邀勲

送人往荊州

草色隨驄馬悠悠同出秦
水傳雲夢曉山接洞庭
春帆影連三峽猿聲近
四鄰青門一分首難見
杜陵人

寄淨虛上人初至雲門

寒蹤白雲裏法侶自提携
竹逕通城下松門隔水
西方同沃州去不似武陵迷
髣髴心知處高峯是
會稽

尋劉處士

幾年人不見林下掩柴關
留客當清夜逢君話舊
山隔城寒杵急帶月早鴻還
南陌雖相近其如隱
者閑

送權暉

淮海風濤起江開夏思長
同悲鵲繞樹獨作鴈隨

陽山晚雲和雪汀寒月照霜由來濯纓處漁父愛
滄浪

同杜相公對山僧

吏散重門掩僧來閣復閑遠心馳北闕春興寄東
山草長風光裏鸞啼靜默間芳晨不可駐惆悵暮
禽還

皇甫曾集卷上

皇甫曾集卷下

五言排律

奉和杜相公移入長興宅呈諸宰執

欲向幽偏適還從絕地移秦官鼎食貴堯世土階
卑戟戶槐陰滿堂窓竹葉垂才分午夜漏遙隔萬
年枝北闕深恩在東林遠夢知日斜門掩映山遠
樹參差論道齊鴛翼題詩憶鳳池從公亦何幸長
與佩聲隨

贈鑒上人

律儀傳教誘僧臘老煙霄樹色依禪誦泉聲入寂

寥寶龕經末劫畫壁見南朝深竹風開合寒潭月
動搖息心歸靜理愛道坐中宵更欲尋真去乘船
過海潮

送湯中丞和番

繼好中司出天心外國知己傳堯雨露更說漢威
儀隴上應延首河源復載馳孤峰問徒御空磧見
旌麾春草鄉愁起邊城旅夢移莫嗟行地遠此去
荅恩私

送和西蕃使

白簡初分命黃金已在腰恩華通外國徒御發中

朝雨雪從邊起旌旗上隴遙暮天沙漠漠空礫馬
蕭蕭城路隨河水關城見柳條和戎先罷戰知勝
霍嫖姚

送王相公赴幽州

台袞兼戎律勤憂秉化元鳳池東掖寵龍節北方
尊長路山河轉前驅鼓角喧人安布時令地遠荅
君恩暮日平沙漠秋風大旆翻漁陽在天末戀別
信陵門

送徐大夫赴南海

舊國當分闢天涯荅聖私大軍傳羽檄老將拜旌

旗位重登壇後恩深弄印時何年諫獵賦今日飲
泉詩海內求民瘼城隅見島夷由來黃霸去自有
上台期

七言律詩

早朝日寄所知

長安歲後見歸鴻紫禁朝天拜舞同曙色漸分雙
闕下漏聲遙在百花中鑪煙乍起開仙仗玉珮成
行引上公共荷發生同雨露不應黃葉久從風

秋夕寄懷素上人

已見槿花朝委露獨悲孤鶴在人群真僧出世心

無事靜夜名香手自焚窓臨絕澗同流水客至孤
峰掃白雲更想清晨誦經處獨看松上雨紛紛

張芬見訪郊居作

林中雨散早涼生已有迎秋促織聲三徑荒蕪羞
對客十年衰老愧稱兄愁心自惜江籬晚世事方
看木槿榮君若罷官携手去尋山莫計白雲程

奉寄中書王舍人

腰金載筆謁承明至道安禪得此生西掖幾年綸
綽貴東山遙夜薜蘿情風傳漏刻星河曙月上梧
桐雨露清聖主好文誰爲薦閉門空賦子虛成

五言絕句

洛中口號

還鄉不見家
年老眼多淚
車馬上河橋
城中好天氣

山下泉

漾漾帶山光
澄澄倒林影
那知石上喧
却憶山中靜

送王司直

西塞雲山遠
東南道路長
人心勝潮水
相送過潯陽

七言絕句

酬竇拾遺秋日見呈

孤城永巷時相見
衰柳閑門日半斜
欲送近臣朝
魏闕猶憐殘菊在陶家

韋使君字海榴詠

淮陽臥理有清風
臘月榴花帶雪紅
閉閣寂寥常
對此江湖心在數枝中

嶧嶺四望

漢家仙仗在咸陽
洛水東流出建章
野老至今猶
望幸離宮秋樹獨蒼蒼

皇甫曾集卷下終

權德輿集卷上

賦

傷馴鳥賦

紛羽族之多端兮同翮飛而類殊有鸚鵡之微禽
亦播質於洪鑪因稚子之嬉遊得中園之墜雛恣
飲啄以馴擾來目前與坐隅爾乃棲以籠楹鍛其
羽翼留軒以爲娛俾遐翥之無力乍踉蹌而將
舉顧襍褫而復息雖主人之見容終使翼天和於
自得或覓實至止微軫徐觸每聞絃而鼓翼亦逗
節而翹足貌宛轉以成態聲間關而助曲乍寂寞

以閑暇若凝情於相矚理輕毳以自潔類山玄之
佩玉每翔集以安卑同君子之自牧思謝尚之起
舞邁風流之逸獨苟魯昭之不君固乾侯之出辱
方渡濟以申傲伊涼德之自覆徵故老之相傳驗
曩記之或存在端正之司辰剪其舌而能言巧喉
轉以達情順人心而不諼方渴日以呈材願朱明
之駿奔忽愴愀以顛顛響於簾箔竟啁啾而不去
若徊翔之有託悅心訝而未辨歛狎狂之攫搏俄
斃路而不勝紛血灑以毛落彼葛盧與冶長通鳥
獸之音聲闕君子之周防無古人之至精旣不能

縱爾於遼廓又不能遂爾之生成使異類之得志
曾未極其飛鳴則本夫養之之惠適所以害其生
生又憶夫清江之使者東海之波臣其時之不來
則剗腸而涸鱗鷓鐘鼓而反悲馬 棧而多死雖
爲遇之已甚固又夫其天理嘗聞乎賢聖之理物
也愚智殊方薰猶異藏善用無棄兮 見其長各
有攸處兮兩不相傷官天地而府萬物繇此道而
爲常吾旣悟斯理之不早因失之而後防收視聽
以冥觀兮遂群性之茫茫

鵲巢背太歲賦

管巢有因惟鵲無能始自小寒之日不當太歲之神辨向背以經營必先避地顧縱橫而積足以藩身且其矯翼徘徊向隅栖息時懷擇木之志日就積薪之力若在離宮之內不可巢南如當子位之中無因逐北所以率先表異選勝知歸應時節而遷易辨方隅之是非念彼明神自易地而攸處顧茲弱羽信何枝而可依時也苟遂居安寧辭力役銜腐草而構思向高柯以容跡動觀所忌桀古人之巢理契不齊如方士之工曆擇地已有知風豈無方一枝而自託雖小數之能拘且相質以

和鳴喜同於雀乃卜居而聚類趨甚於鳧况復藉用茅茨殊荷庇盖任風雨而自適豈陰陽而去泰念土宜之是顧足見方信天願以自然焉能向晦爾乃節屬玄律時方沍寒理地角而知禁豈天時之可干無起土切異銜泥而萃止知於歲杪聊寓跡以求安既而飲啄無虛推移不滯得厭勝之良術誠棲遲之上計潛軫鳴條之慮必附枳枸之勢摧枯拉朽已完葺於崇朝命似引雛聊優游於卒歲故顧末俗之無違信微禽之可繼

五言古詩

廣陵行

廣陵寔佳麗隋季此爲京八方稱輻輳五達如砥
平大旆映空色笳簫發連營層臺出重霄金碧摩
灑清交馳流水轂迴接浮雲甍青樓旭日映綠野
春風晴噴玉光照地嘖蛾價傾城燈前頻巧笑陌
上相逢迎飄飄翠羽薄掩映紅襦明蘭麝遠不散
管絃間自清曲士守文墨達人隨性情茫茫竟同
盡冉冉將何管且申今日歡莫務身後名肯學諸
儒輩書窓誤一生

古別離

人生天地間譬若六轡馳天壽旣常數奈何生別
離跡當中人域正性日已衰是非千萬境杳靄情
塵滋出門事何常暫別亦難期冉冉歎流景悠悠
限山陂盡此一夕歡華樽會前墀雞鳴東方曙夙
駕臨通達欲出懶移步欲畱難致詞兩情不得已
念此畱何爲天明去已遠寂默居人歸入門復上
堂惏惏生驚疑經履同遊處猶言常相隨覽物或
臨鏡翻恠來何遲乃知前日歡本爲今日悲翻思
別後心寧及未見時則知交踈分又又翻易持報
君未別人別後當自知

浩歌

杖策出蓬華浩歌愁思長北風吹荷衣蕭颯景氣
涼通達抵山郭里巷連湖光孤雲淨遠峰綠水溢
方塘魚鳥樂天性雜英互芬芳我心獨何爲萬慮
縈中腸履道身未泰主家謀不臧心爲世教牽跡
寄翰墨場出處兩未定羈孤空自傷沉憂不可裁
佇立河之梁晚歸茅簷下左右陳壺觴獨酌復長
謠放心遊八荒得喪同一域是非亦何常胡爲苦
此生吃吃徒自強乃泛杯中物可令憂患亡因茲
謝時輩棲息無何鄉

奉和聖製中和節賜百官宴集因示所懷
萬古慶嘉節宴喜皇澤均曉開冥莢初景麗百鳥
春藻思貞百度著明並三辰物情舒在陽時令弘
至仁衢酒和樂被薰絃聲曲新賡歌武弁側永荷
玄化醇

奉和聖製九月十八日賜百寮追賞因書
所懷

錫宴朝野洽追歡堯舜情秋堂絲管動水榭煙霞
生黃花媚新霽碧樹含餘清同和六律應交泰萬
寓平睿藻下中天湛恩 文明小臣諒何幸亦此

影華纓

奉和聖製九日言懷賜中書門下及百寮

應制

令節在豐歲皇情喜又安
絲竹調六律簪裾列千
官煙霜暮景清水木秋光寒
筵開曲池上望盡終
南端天麗慶霄漢墨妙驚飛鸞
願言黃花酒永奉
今日歡

奉和聖製重陽日中外同歡以詩言志因

示群臣

玉醴宴嘉節拜恩歡有餘
煌煌菊花秀馥馥萸房

舒白露秋稼熟清風天籟虛
和聲度簫韶瑞氣深
儲胥百辟皆醉止萬方今晏如
宸衷在化成藻思
煥瓊琚微臣徒竊抃豈足歌唐虞

奉和聖製重陽日即事六韻

嘉節在陽數至歡朝野同恩隨
千鍾洽慶屬五稼
豐時菊洗露華秋池涵霽空
金絲響僊樂劔馬羅
群公天道光下濟賡歌敷大中
多慙擊壤曲何以
達堯聰

奉和聖製豐年多慶九日示懷

寒露應秋節清光澄曙空
澤均行葦厚年慶黍禾

豐聲名暢八表宴喜陶九功文麗日月合樂和天
地同聖言在推誠臣職事匪躬瑣細何以報翺飛
淳化中

璩授京兆府叅軍戲書以示兼呈獨孤郎
見爾府中趨初官足慰吾老牛還舐犢凡鳥亦將
雛喜至翻成感癡來或欲殊因慙玉潤客應笑此
非夫

戶部王曹長楊考功崔刑部二院長並同
鍾陵使府之舊因以寄贈又陪郎署喜甚
常寮因書所懷且叙前好

忽驚西江侶共作南宮郎宿昔芝蘭室今茲鴛鴦
行子猷美風味左戶推公器含毫白雪飛出匣青
萍利子雲常燕居作賦似相如間成考課奏別貢
院能書子玉諒真實持刑慎丹筆秋天鴻鵠姿晚
歲松筠質伊予誠薄才何幸復趨陪偶來塵右掖
空此憶中臺時節東流馭悲歡追往事待月登庾
樓排雲上蕭寺盍簪蓮府讌落帽龍沙醉極浦送
風帆靈山眺煙翠解頤通善謔喻指窮精義搦管
或飛章分曹時按吏雨散與蓬飄秦吳兩寂寥方
期全擁腫豈望躡扶搖夜直分三署晨趨共九霄

外庭時接武廣陌更連鑣
北極星辰拱南薰氣序
調欣隨衆君子並立聖明朝

酬別蔡十二見贈

伊人茂天爵恬澹卧郊園
傲世方隱几說經久顛
門浩歌曳柴車詎羨丹轂尊
嚴霜被鶉衣不知狐
白溫游心羲文際愛我相討論
潢汗忽朝宗傳騎
令載奔崢嶸歲陰晚愀愴離念繁
別館絲桐清寒
郊煙雨昏中飲見逸氣縱談窮
化元佇看公車起
聖代待乞言

送崔諭德致仕東歸

天子坐法宮詔書下江東
懿此嘉遯士蒲草起丘
中褐衣入承明朴畧多古風
直道侍太子昌言沃
宸聰巖居四十年心與鷗鳥同
一朝受恩澤自說
如池龍乞骸歸故山累疏明深衷
大君不奪志命
錫忽以崇旭旦出東門輕裝若秋蓬
家依白雲嶠
手植丹桂藂竹齊引寒泉霞月相玲瓏
曠然解赤
黻去逐冥冥鴻

送信安劉少府

相看結離念盡此杯中醪
夷代輕遠遊上才隨薄
祿參卿滯孫楚隱市同梅福
吏散時泛絃賓來閒

覆局襟情無俗慮談笑成逸躅此路足灘聲羨君
多水宿

奉使宜春夜渡新淦江陸路至黃蘗館路
上遇風雨作

草草理夜裝涉江又登陸望路殊未窮指期今已
促傳呼戒徒馭振轡轉林麓陰雲擁巖端霈雨當
山腹震雷如在耳飛電來照目獸跡不敢窺馬蹄
唯務速虔心若齋禱濡體如沐浴萬竅相怒號百
泉暗奔瀑危梁慮足跌峻坂憂車覆問我何以然
前日受微祿轉知人代事纓組乃微束向若家居

時安枕春夢熟遵途稍已近候吏來相續曉霽心
始安林端見初旭

從事淮南府過亡友楊校書舊廳感念悄
然遂書十韻

故人隨化往倏忽今六霜及我就拘限清風留此
堂松竹逾映鬱芝蘭自銷亡絕絃罷流水聞笛同
山陽潔如冰玉姿粲若鸞鳳章欲翥摧勁翮先秋
落貞芳正平賦鸚鵡文考頌靈光二子苦不弔夫
君今可傷黃壚既杳杳玄化亦茫茫豈必恨宿草
含淚灑衣裳

與道者同守庚申

洞真善救世守夜看僊經俾我外持內當茲申配
庚齋心已恬愉澡身自澄明沉沉簾帷下靄靄燈
燭清四支動用息一室虛白生收視忘取捨叩齒
集神靈伊予嗟慾寡居常痾恙輕三尸既伏竄九
臟乃和平無令耳目勝則使性命傾窅然深夜中
若與元氣并釋宗稱定惠儒師著誠明派分示三
教理詣無二名吉祥能止止委順則生生視履苟
無咎天祐期永貞應物智不勞虛中理自冥豈資
金丹術即此駐頽齡

送人使之江陵

嘉招不辭遠捧檄利攸徃行役念前程讌遊睽舊
賞征軺星乍動江信潮應上煙水飛一帆霜風搖
五兩紛紛別袂舉切切離鴻響後會杳何時悠然
勞夢想

送韋中丞奉使新羅

淳化洽聲明殊方均惠養計書重譯至錫命雙旌
徃星辭北極遠水泛東溟廣斗柄辨宵程天琛宜
晝賞孤光洲島迴淨綠烟霞敞展禮盛賓徒交歡
覲君長經途勞視聽捨別縈夢想延頸旬歲期新

恩在歸鞅

與沈十九拾遺同遊栖霞寺上方夜於亮

上人院會宿

躡山標勝絕暇日諧想矚縈紆松路深繚繞雲巖
曲重樓迴樹杪古像作山腹人遠水木清地深蘭
桂馥層臺聳金碧絕頂摩淨綠下界誠可悲南朝
紛在目焚香入古殿待月出深竹稍覺天籟清自
傷人世促宗雷此相遇偃放隨所欲清論月輪低
閒吟茗花熟一生如上梗萬慮相桎梏永願事潛
師窮年此棲宿

雜詩

淇水春正綠上宮蘭葉齊光風兩搖蕩鳴佩出中
閨一顧授黃流千金呈瓊犀徒然路傍子恍恍復
悽悽

月夜江行

扣舷不能寐浩露清衣襟彌傷孤舟夜遠結萬里
心幽興惜瑤草素懷寄鳴琴三奏月初上寂寥寒
江深

豐城劍池驛

龍劍昔未發泥池相晦藏向非張茂先孰辯斗牛

光神物不自達聖賢亦彷徨我行豐城野慷慨心
內傷

渭水

呂氏年八十幡然持釣鉤意在靖天下豈惟食營
丘師臣有家法小白乃尊周日暮駐征策愛茲清
渭流

晚渡揚子江卻寄江南親故

返照滿寒流輕舟任搖蕩支頤見千里煙景非一
狀遠岫有無中片帆風水上天清去鳥滅浦迥寒
沙漲樹晚疊秋嵐江空翻宿浪曾中千萬慮對此

一清曠回首碧雲深佳人不可望

感寓

殘雨倦奇枕病中時序分寒蟲與秋葉一夜隔牕
聞虛室對搖落晤言無與群冥心試觀化世故如
絲棼但看鳶戾天豈見山出雲一歌徒擊節朱絃
秘南薰倚梧秀朝陽上有威鳳文終待九成奏來
儀瑞吾君

古意

家人強進酒酒復能忘情持杯未飲時衆感紛已
盈明月照我傍庭柯振秋聲空階白露下枕席涼

風生所思萬里餘水闊山縱橫佳期憑夢想未晚
愁鷄鳴願得一心人當年懼樂并長筵映玉俎素
指彈秦箏暇睇呈巧笑惠音激淒清此願良未果
永懷空如醒

祇命赴京途次淮口因書所懷却寄使府

群公

弱植素寡偶趨時非所任感恩再登龍求友皆斷
金彪柄覩奇彩淒鏘聞雅音適欣佳期接遽嘆離
思侵靡靡遵遠道忡忡勞寸心難成獨酌謠空奏
伐木吟沉寥清冬時蕭瑟白晝陰交懽諒如昨滯
念紛在今因風試矯翼倦飛會歸林向晚清淮駛
迴首楚雲深

早發杭州泛富春江寄陸三十六公祐

候曉起徒馭春江多好風白波連青雲蕩漾晨光
中四望浩無際沉憂將此同未離奔走途但恐成
悲翁俯視觸餌鱗仰目凌霄鴻纓塵日已厚心累
何時空泛泛此人世所向皆樊籠唯應杯中物醒
醉皆窮通故人玄圃姿瓊樹分青葱終當此山去
共結蘭桂叢

雜詩二首

婉彼羸氏女吹簫偶蕭史彩鸞駕霏烟綽約兩仙子
神期諒交感相顧乃如此豈此成都人琴心中
夜起

陽臺巫山上風雨忽清曠朝雲與遊龍變化千萬
狀魂交復目斷縹緲難此况蘭澤不可清凝情坐
惆悵

奉送韋起居老舅百日假滿歸嵩陽舊居
威鳳翔紫氛孤雲出寥天竒彩與幽姿縹緲皆自
然常聞陶唐氏亦有巢許全以茲聳風俗豈必効
羈牽大君遂群方左史蹈前賢振衣去朝市賜告

歸林泉滑和固難久循性得所便有名皆畏途無
事乃真筌舊壑窮杳冥新潭漾淪漣巖花落又開
山月缺復圓輕策逗蘿徑幅巾凌翠煙機閒魚鳥
狎體和芝朮鮮四皓本避難二疏猶待年况今寰
宇清復此鬢髮玄顧慙纓上塵未絕區中緣齊竿
終自退心寄嵩峯巔

寄侍御從舅

靡靡南軒蕙迎風轉芬滋落落幽澗松百尺無附
枝世物自多故達人心不羈偶陳幕中畫永負林
間期感恩從慰薦循性難縈維野鶴無俗質孤雲

多異姿清冷松露泫照灼巖花遲終賞稅塵駕來
就東山嬉

竹逕偶作

退朝此休沐閉戶無塵氛支策入幽徑清風隨此
君瑟觴恣偃傲蘭蕙相氛氲幽賞方自適林西煙
景曛

嚴陵釣臺下作

絕頂聳蒼翠清湍石磷磷先生晦其中天子不得
臣心靈棲顛元纓冕猶緇塵不樂禁中卧却歸江
上春潛驅東漢風日俊薄者醇焉用佐天子特此

報故人則知大賢心不獨私其身弛張有深致耕
釣陶天真柰何清風後擾擾論屈伸交情同市道
利欲相紛綸我行訪遺臺仰古懷逸民矰繳鴻鵠
遠雪霜松桂新江流去不窮山色凌秋旻人世自
今古清輝照無垠

權德輿集卷上

權德輿集卷下

七言古詩

妾薄命篇

昔住邯鄲年尚少只是嬌羞弄花鳥青樓碧沙大道邊綠楊日暮風裊裊嬋娟玉貌二八餘自矜顏色花不如麗質全勝秦氏女藁砧寧用專城居歲去年來年漸長青蛾紅粉全堪賞玉樓珠箔但閑居南北東城詎來往韶光日日看漸遲標梅既落行有時寧知燕趙娉婷子翻嫁幽并遊俠兒年年結束青絲騎出門一去何時至秋月空懸翡翠簾

春帷懶卧鴛鴦被沙塞經時不寄書深閨愁獨意
何如花前拭淚情無限月下調絃恨有餘離別苦
多相見少洞房愁夢何由曉閒看雙鸞淚霏霏靜
對空牀魂悄悄鏡裏紅顏不自禁陌頭香騎動春
心爲問佳期早晚是人人總解有黃金

送韋行軍員外赴河陽

五年武弁侍明光輟佐中權拜外郎記事還同楚
倚相傳經遠自漢扶陽離堂處處羅簪組東望河
橋壯鼙鼓三城曉角啓轅門一縣繁花照蓮府上
略儒風並者稀翩翩騶騎有光輝只今左職多虛

位應待他時仗節歸

錫杖歌送明楚上人歸佛川

上人遠自西天至頭陀行遍南朝寺口翻貝葉古
字經手持金策聲泠泠護法護身唯振錫石瀨雲
溪深窸窣乍來松徑風露寒遙暎霜天月成魄後
夜空山禪誦時寥寥掛在枯樹枝真法常傳心不
住東西南北隨緣路佛川此去何時迴應真莫便
游天台

古樂府

光風淡蕩百花吐樓上朝朝學歌舞身年二八壻

侍中幼妹承恩兄尚主綠窓珠箔繡鴛鴦侍婢先
焚百和香鶯啼日出不知曙寂寂羅幃春夢長

放歌行

夕陽不駐東流急榮名貴在當年立青春虛度無
所成白首銜悲亦何及拂衣西笑出東山君臣道
合俄頃間一言一笑玉墀上變化生涯如等閒朱
門杳杳冽華戟坐中皆是王侯客鳴環動佩暗珊
珊駿馬花驄白玉鞍十年斗酒不知貴半醉留賓
邀盡歡銀燭煌煌夜將久侍婢金罍瀉春酒春酒
盛來琥珀光暗聞蘭麝幾般香乍看皓腕映羅袖

微聽清歌發杏梁雙鬟美人君不見一一皆勝趙
飛燕迎杯乍舉石榴裙勻粉時交合歡扇未央鐘
漏醉中聞聯騎朝天曙色分雙闕煙雲遙靄靄五
衢車馬亂紛紛罷朝鳴珮驟歸鞍今日還同昨日
歡歲歲年年恣游讌出門滿路光輝遍一身自樂
何足言九族爲榮真可羨男兒稱意須及時閉門
下帷人不知年光看逐轉蓬盡徒詠東山招隱詩

和李中丞慈恩寺清上人院牡丹花歌

淡蕩韶光三月中牡丹偏自占春風時過寶地尋
香徑已見新花出故叢曲水亭西杏園北濃芳深

院紅霞色擢秀全勝珠樹林結根幸在青蓮域艷
藥仙房次第開含煙洗露照蒼苔龐眉倚杖禪僧
起輕翅縈枝舞蝶來獨坐南臺時共美閒行古刹
情何已花間一曲奏陽春應爲芬芬此君子

秋閨月

三五二八光如練海上天涯人共見不知何處玉
樓前乍入深閨玳瑁筵露濃香徑知愁坐風動羅
帷照獨眠初卷珠簾看不足斜抱箜篌未成曲稍
應粧臺臨綺窓遙知不語淚雙雙此時愁望知何
極萬里秋天同一色靄靄遙分陌上光迢迢對此
閨中憶早晚歸來歡燕同可憐歌吹月明中此夜
不堪腸斷絕願隨流影到遼東

古興

月中有桂樹無翼難上天海底有驪珠下隔萬丈
淵人生在限雖百歲就中三十稱一世晦明烏兔
相推遷雪霜漸到雙鬢邊沉憂感戚多浩歎不得
如意居太半一氣暫聚常恐散黃河清兮白石爛

五言律詩

初秋月夜直宿因呈楊閣老

欹枕直廬暇風蟬迎早秋沉沉玉堂夕皎皎金波

流對掌喜新命分曹諧舊遊相思翫華彩因感庾
公樓

送謝孝廉移家越州

家承晉太傅身慕魯諸生又見一帆去共愁千里
程沙平煙樹迥潮滿晚江晴從此幽深去無妨隱
姓名

送鄭秀才貢舉

西去意如何知隨貢士科吟詩向月露驅馬出煙
蘿晚色寒蕪遠秋聲候鴈多自憐歸未得相送一
勞歌

周平西墓

英威今寂寞陳迹對崇丘壯志清風在荒墳白日
愁窮泉那復曉喬木不和秋晚歲寒塘側無人水
自流

蘇小小墓

萬木荒墳在悠然我獨尋寂寞紅粉盡冥漠黃泉
深蔓草映寒水空郊暖夕陰風流有佳句吟眺一
傷心

太尉兼中書令贈太師西平郡王挽詞

翊戴推元老謀猷合大君河山封故地金石表新

墳劍履歸長夜笳簫咽暮雲還經誓師處薤露不堪聞

故司徒兼侍中贈太傅北平郡王挽詞

授律勲庸盛居中鼎鼐和佐時調四氣盡力靜三河忽訪天京兆空傳漢伏波今朝麟閣上偏軫聖情多

贈涼國惠康公主挽歌

外館嬪儀貴中叅睿渥深初笄橫白玉盛服鏤黃金鳳度簫聲遠河低婺彩沉夜臺留冊謚悽愴有徽音

魏國憲穆公主挽詞

漢制榮儀服周詩美肅雍禮尊同姓主恩錫大名封外館留圖史陰臺闕德容睿慈歌薤露千古仰芳蹤

長相思

少小別潘郎嬌羞倚畫堂有時裁尺素無事約殘黃鵲語臨粧鏡花飛落繡牀相思不解說明月照空房

酬劉端公中秋夜對月見懷

涼夜清秋半空庭皓月圓動搖隨積水皎潔滿晴

天多病佳期阻深情麗曲傳偏懷賞心處同望庾樓前

國子柳博士兼領太常博士輒申賀贈

博士本秦官求才帖職難臨風曲臺淨對月壁池
寒講學分陰重齋詞曉漏殘朝衣辨色處雙綬更
宜看

送裴秀才貢舉

儒衣羞此別去抵漢公卿賓貢年猶少篇章藝已
成臨流惜暮景話別起鄉情離酌不辭醉西江春
草生

送張周二秀才謁宣州薛侍郎

儒衣兩少年春棹穀溪船湖月供詩興煙嵐費酒
錢上帆投極浦歌枕傲晴天不用愁羈旅宣城太
守賢

送李城門罷官歸嵩陽

與君相識處吏隱在墻東啓閉千門靜逢迎兩掖
通罷官多暇日肄業有儒風歸去塵寰外春山蘭
桂藜

送上虞丞

越郡佳山水清江接上虞計程航一葦試吏佐雙

梹榔嶼集卷一
五
鳧雲壑窺仙籍風謠驗地圖因尋黃絹字爲我弔
曹盱

送人之九江

九派潯陽郡分明似畫圖秋光連瀑布晴翠辨香
鑪才子厭蘭省邦君榮竹符江城多暇日能寄八
行無

與故人夜坐道舊

笑語歡今夕烟霞愴昔遊清羸還對月遲暮更逢
秋勝理方自得浮名不在求終當製初服相與卧
林丘

奉陪李大夫九日龍沙宴會

龍沙重九會千騎駐旌旗水木秋光淨絲桐雅奏
遲烟蕪斂暝色霜菊發寒姿今日從公醉全勝落
帽時

新安江路

深潭與淺灘萬轉出新安人遠禽魚靜山深水木
寒簫起青蘋末吟矚白雲端即事遂幽賞何必掛
儒冠

湖上晚望呈惠上人

湖上烟景好鳥飛雲自還幸因居止近日覺性情

閒獨酌乍臨水清奇常見山此時何所憶法侶話
玄關

送映師歸本寺

還歸柳寺去遠遠出人郡苔甃桐花落山牕桂樹
薰引泉通絕澗放鶴入孤雲幸許宗雷到清談不
易聞

送文暢上人東遊

桑門許辨才外學接宗雷護法麻衣淨翻經貝葉
開塵喧知不染忘想自堪哀載結西方社師遊早
晚迴

送穆侍御歸覲東都

知君儒服貴綵繡兩相輝婉婉成名後翩翩擁傳
歸江深烟嶼沒山暗雨雲飛共待酬恩罷相將去
息機

送盧評事婺州覲省

知向東陽去晨裝見綵衣客愁青眼別家喜玉人
歸漠漠水烟晚蕭蕭楓葉飛雙溪泊船處候吏拜
朝威

送崔端公郎君入京覲省

已見風姿美仍聞藝業勤清秋上國路白晷少年

人帶月輕帆疾迎霜綵服新過庭若有問一爲說
漳濱

張工部發引日屬傷足卧疾不遂執紼

子春傷足日况有寢門哀元伯歸全去無由白馬
來笳簫里巷咽龜筮墓田開片日潺湲淚含悽叙
史才

玉山嶺上作

悠悠驅足馬征路上連岡晚翠深雲竇寒苔淨石
梁荻花偏似雪楓葉不禁霜愁見前程遠空郊下
夕陽

觀葬者

塗芻隨晝哭數里至松門貴盡人間禮寧知逝者
魂笳簫出廣陌煙雨閉寒原萬古皆如此傷心反
不言

送王鍊師赴王屋洞

稔歲在芝田歸程入洞天白雲辭上國青鳥會群
僊自以基消日寧資藥駐年相看話離別風馭忽
泠然

題郡端公林亭

春光何處好柱史有林塘鶯囀風初暖花開日欲

長鑿池通野水掃徑閱新芳更置盈樽酒時時醉
楚狂

春日同諸公過兵部王尚書林園

休沐君相近時容曳履過花間留客久臺上見春
多松色明金艾鶯聲雜玉珂更逢新酒熟相與籍
庭莎

五言排律

晚秋陪崔閣老張祕監苗考功同遊昊天
觀

方駕遊何許仙源去似歸縈迴留勝賞瀟灑出塵
機泛菊賢人至燒丹姹女飛步虛清晚籟隱几吸
晨輝竹徑琅玕合芝田沆瀣稀銀鈎三洞字瑤笥
六銖衣麗句翻紅藥佳期限紫微徒然一相望郢
曲和應稀

與沈十九拾遺同遊栖霞寺上方夜於亮
上人院會宿

偶來人境外心賞幸隨君古殿煙霞夕深山松桂
薰巖花點寒溜石磴掃春雲清淨諸天近喧塵下
界分名僧康寶月上客沈休文共宿東林夜清猿
徹曙聞

酬裴傑秀才新櫻

新果真瓊液來應宴紫蘭圓疑竊龍頷色已奪鷄
冠遠火微微辨殘星隱隱看茂先知味易曼倩恨
偷難忍用烹駢駱從將翫玉盤流年如可駐何必
九華丹

韋賓客宅與諸博士宴集

累抗乞身章湛恩比上庠賓筵徵稷嗣家法自扶
揚簪組歡言久琴壺雅興長陰嵐冒苔石輕籟韻
風篁佩玉三朝貴揮金百慮忘因知卧商維豈勝
白雲鄉

送工部張曹長大夫奉使西蕃

珠鄰覆露同奉使小司空西候車徒出南臺節印
雄弔祠將渥命導譯暢皇風故地山河在新恩玉
帛通塞雲疑廢壘關月照驚蓬青史書歸日翻輕
五利功

哭劉四尚書

士友惜賢人天朝喪守臣才華推獨步聲氣幸相
親理柝寰中妙儒為席上珍笑言成月旦風韻揖
天真丹地膺推擇青油寄撫循豈言朝象魏翻是
卧漳濱命賜龍泉重追榮密印陳撤絃驚物故無

具見家貧牢落風悲笛沈瀾涕泣中共嗟蒿里月
非復柳營春黃絹碑文在青松隧路新音容無處
所歸作此邱塵

七言律詩

送商州杜中丞赴任

安康地理接商於帝命專城總賦輿夕拜忽辭青
瑣闥晨裝獨捧紫泥書深山古驛分騶騎芳草閒
雲逐隼旗綺皓清風千古在因君一為謝巖居

酬靈澈上人以詩代書見寄

蓮華出水地無塵中有南宗了義人已取貝多翻

半字還將陽歇論三身碧雲飛處詞偏麗白月圓
時性本真更喜開緘銷熱惱西方社裏舊相親

和司門殷員外早秋省中直夜寄荆南衛

端公

共嗟王粲滯荊州才子為郎憶舊遊涼夜偏宜粉
署直清言遠待玉人酬風生北渚煙波闊露下南
宮星漢秋早晚得為同舍旅知君兩地結離憂

送張閣老中丞持節冊弔回鵲

旌旆翩翩擁漢官君行當得遠人歡分職南臺知
禮重綴書東觀見才難金章玉節鳴騶遠白草黃

雲出塞寒欲散別離唯有酒慙煩賓從駐征鞍

田家即事

閒卧藜牀對落暉條然便覺世情非漠漠稻花資
旅食青青荷葉製儒衣山僧相勸期中飯漁父同
游或夜歸待學向平婚嫁畢渚烟溪月共忘機

待漏假寐夢歸江東舊居因寄惠閣梨茅

處士

十年江浦卧郊園閒夜分明結夢魂舍下烟蘿通
古寺湖中雲雨到前軒南宗長老知心法東郭先
生識化源覺後忽聞清漏曉人隨簪珮入君門

奉和太常豈卿閣老左藏庫中假山之什

春山僊掌百花開九棘腰金有二才忽向庭中摹
峻極如從洞裏見昭回小松已負千霄壯片石皆
疑縮地來都內今朝似方外仍傳麗句寄雲臺

送李處士弋陽山居

甞來城市意何如卻憶菖陽溪上居不憚薄田輸
井稅自將佳句著州閭波翻極浦檣竿出霜落秋
郊樹影踈想到家山無俗侶逢迎只是坐藍輿

哭張十八校書

芸閣爲郎一命初桐州寄傲十年餘魂隨遊水居

何處名在新詩衆不如蹉跎江浦生華髮牢落寒
原會素車更憶八行前日到含悽爲報秣陵書

朔旦冬至攝職南郊

大明南至應天正朔旦園丘樂九成文軌盡同堯
曆象齋祠忝備漢公卿星辰列位祥光滿金石交
音曉奏清更有觀臺稱賀處黃雲捧日瑞昇平

五言絕句

玉臺體三首

秋風一夜至吹盡後庭花莫作經時別西隣是宋
家

昨夜裙帶解今朝蟾子飛鉛華不可棄莫是藁砧
歸

萬里行人至深閨夜未眠雙眉燈下掃不待鏡臺
前

嶺上逢久別者又別

十年曾一別征旆此相逢馬首向何處夕陽千萬
峰

江行晚詠

古樹夕陽盡空江暮靄收寂寞扣舷坐獨生千載
愁

江行夜詠

後聲到枕上愁夢紛難理
寂寂深夜寒清霜落秋水

曉

曉風搖五兩殘月映石壁
稍稍曙光開片帆在空碧

七言絕句

題雲師山房

雲公蘭若深山裏
月明松殿微風起
試問空門清淨心
蓮花不省秋潭水

餘干贈別張二十二侍御

蕪城陌上春風別
于越亭邊歲暮逢
驅車又愴南
北路返照寒江千萬峰

贈老將

白草黃雲塞上秋
曾隨驃騎出并州
鞭轡劍折虬
鬚白轉戰功多獨不侯

官人斜

一路斜分古驛前
陰風切切晦秋烟
鉛華新舊共
冥冥日暮愁鴉飛野田

舟行夜泊

蕭蕭落葉送殘秋
寂寞寒波急
暝流今夜不知何
處泊
斷猿晴月引孤舟

贈天竺靈隱二寺主

石路泉流兩寺分
尋常鐘磬隔山聞
山僧半在
中峰住
共占清猿與白雲

題柳郎中故居

下馬荒堦日欲曛
潺潺石溜靜中聞
鳥啼花落人
聲絕
寂寞山窓掩白雲

朝元閣


繚垣複道上層霄
十月離宮萬國朝
胡馬忽來清

蹕去空餘臺殿照
山楸

權德輿集卷下

推御身集卷

七



Blank printed text area with vertical lines.

